

# GUITS NE GLO PQUIAA

## JUAN

---

**1** ¡Diuzh to!

Laa naa gzodiidznie to ganle cho nac Jesús.

Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze biaad me lo guidzliu; grop diag no bdzion no grë mine bnee me, grop lo no bdzion no grë mine been me; sac bdzionpaa no zha rac me, zha rnee me, haxta bzhieen no nia me. <sup>2</sup>Ni niina laa no quianee lo miech ganle cho nac me; golgacnan ganle, me rneedz tib guielmban ne gdzind dze lozh.

Zaatne no Dios men ne nac Pxoze ne, ga no me; zeene biaad me lo guidzliu dzigo bdziunbey no me. <sup>3</sup>Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grë ne, gacnie to no zigne nacnie Dios no (men ne nac Pxoze ne), zigne nacnie Jesús no, men ne nac Xpëed me. <sup>4</sup>Laa naa rnee grë min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

<sup>5</sup>Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guiend zaatne no me; laa grë dol, masaque naca zig nac guielcow. Ni mincoque gon rnee no lo to. <sup>6</sup>Gacxe waa, telne rnee ne nacniele ne me, ni rlozh ga tibaque lo guielcow co no ne, rquidie ne ga dzigo. <sup>7</sup>Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grë ne; ni scagaa, xchen Jesús nac mine csanmbe ne lo grëtaa xtol ne.

<sup>8</sup>Nana tel guiab ne: Tel naa ib peet dol rapd naa. Lëëque ne noquidie ne ga, rnelid ne ga zha nac ne. <sup>9</sup>Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sanmbe me ne lo grëtaa guielntseeb ne zidziun ne; sac ible laa Jesús gut par csanmbe me ne. <sup>10</sup>Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grëse ne miech ngoopdol nac ne.

**2** Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, golsoladz ganle no tib men ne quianab lo Dios men ne nac Pxoze ne yquia zdoo me ne, lëë men co nac Jesús, lo me golbig (tel me ni tib dol rapd me). <sup>2</sup>Sac me bded grëtaa guielnë ne rioguial ne ndieed ne por grëtaa xtol ne, psanwen me ne lo Dios; me goc zig tib gon

ne pcaania Dios gozh grëse xtoꝫ ne, ni xtoꝫ grëraa miech ne ndxie dibdoose lo guidzliu.

### Golleynie samiech to

<sup>3</sup>Golgonā ganle: Telne run ne grëse miñe rnabey Dios, gase rien ne ne nli xnëz me no ne. <sup>4</sup>Laa tel zha ne rnee: “Xnëz me no naa”, ni rlozh ga runð zho grë miñe rnabey me, rquidie zho ga. <sup>5</sup>Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne. <sup>6</sup>Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene biaad me lo guidzliu.

<sup>7</sup>Bets, bzian, golgacnan ganle, none gleynie to samiech to. Guiabde to togo ncub miñe rne naa lo to nu gun to, laa naa rzet miñe binle to glo zeene psilo pquiaadiag to Xtiidz Dios. Niicle ne padzeelale zhubneew, niicle ne pquiaadiagle tow, <sup>8</sup>per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëëb nëz lo xbiini Dios.

<sup>9</sup>Ga nagon, tel zha ne rnee lo biini co mban zho ni rlëënie zho samiech zho, rquidie zho ga; bii lo guielcow ga mban zho. <sup>10</sup>Zha ne rleynie samiech, zha cosi nli lo biini co mban zho, noxtseebd lega tsohe zho, sac ranpaa zho pa lo zie zho; <sup>11</sup>sangue zha ne rlëënie samiech, lo guielcow ga no zho. Masaque nac zho zig zha ne rold lo, niicle zha riend dien pa nëz tsie zho, sac guielcow co quiantse lo zho.

<sup>12</sup>Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtoꝫ to. <sup>13</sup>To ne nac to dad, laa naa rxel diidz rii lo to, porne nac to zha ne riladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rriee lodraa mendox yquiiil ma to. To ne nac to mëëdlaas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoaz ne.

<sup>14</sup>Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquiiil, <sup>15</sup>golguien, gleyniede to grë ncuaañe rap to, gleyniede to grë ncuaañ ndzinlid ne rac lo guidzliu rii. Zha ne rleynie grë ncuaañ co, nlid rleynie zho Dios men ne nac Pxoaz ne; <sup>16</sup>sac grëse ncuaañe rac lo guidzliu rii (zig nac zha ne zienal ncuaañe gdeedguxt xcuerp, zha ne rzoobladz yquianie ncuaañe rdziladztaa, zha ne racniats lo samiech), grëse ncuaañ co led Diosd rnabeya, sinque lëë miñe rzonāl grëraa miech lo guidzliu ga. <sup>17</sup>Ni na tel zig nac guidzliu, zig zie dze laaw quialozh grëw grë ncuaañe rleynie miech low; sangue zha ne mban zigne rnabey Dios, laa zho bgaale tib guielmban ne gdziñd dze lozh.

### Zha ne rlëënie Jesús

<sup>18</sup>Xin yeena, zhile gdziñd dze ne laa guidzliu nitlo. Led binle to ganle ib zrieequia tib zha ne glëënie zhiwseed Jesús, ni nligaa niina len dze rii ndal-le

zaatne norieequia grē zha ne rsilo quiatsidiļ Xtiidz me; gane ndion no ne laa dze co ziaadgaxle. <sup>19</sup>Nli ladaque zha ne nacgrē ne brieē grē zha co, per nliđ nacniepaa zho ne; sac tel niaca miņe nlipaa nacnie zho ne, nrieextsod zho. Ga nagon blu zho ne nliđ nacgrē zho ne.

<sup>20</sup>Sangue to, nacde to zig nac grē zha co, sac nacnie Espiritu Sant to, bneedz me guielbiini lo to runbey to miņe nac diidzli. <sup>21</sup>Guits ne rxel naa lo to nu, nacda par cseed naa to miņe nac diidzli, sac runbeyle tow ni haxta rien to pa miņ nac guielwquidie; sinque laaw ziaad lo to par gacnan to ganle zha nac zha ne noquidie i.

<sup>22</sup>Grē zha ne rnee i nliđ lēē Men ne zēēble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlēēnie zho me ga; ni ne sca riladzd zho cho nac me, yele Pxož me ga riladzd zho. <sup>23</sup>Sac zha ne rlēēnie men ne nac Xpēēd Dios, ga rlu ne nliđ riladzd zho cho nac Dios; sangue zha ne rxobnen cho nac Xpēēd me, zha cosi nli riladzd zho cho nac me.

<sup>24</sup>Laa naa rso diidz lo to sca: Goltsienal grē miņe pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpēēd mew, tibaque gbannie to me. <sup>25</sup>Golsoladz ganle, laa Jesús psanle diidz ne ib zгаа ne tib guielmban ne gdziņd dze lozh; lēē guielmban co yгаа grēse zha ne nacnie me.

<sup>26</sup>Laa naa rzet miņ rii lo to, sac ne squi no grē zha ne ziaad racladz yquidie to. <sup>27</sup>Sangue to laa Jesús pxeelle Espiritu Sant nacnie to, rquiind ne goon choraā cseed to; sac Espiritu Santzhal rneedz guielbiini lo to rien to zha nac grēraā ncuāne no gacnan to, ni mesi gon miņe nac diidzli miņ co rseed me to, led yed me rquidie. Golguien sca, Jesús golbannie, golbannie me zigne noseed Espiritu Sant to.

### Zha ne nac xpēēd Dios

<sup>28</sup>Xin yeēna, nanle to sca sozite to lo Jesús, sinque tibaque golgacnie me; zeēna iņe tibliladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeēne laa me guiaad mban gac zho; sac guielto ne guiaan zho lo me. <sup>29</sup>Nanle to ganle, mesi zigne riegual gac guielwxtis sca run mew; gacxe waa, grēse zha ne nac xpēēd me ible zdeed me miņe riegual zho.

**3** Golwi ganle pa lotaa rleynie Dios ne, laa me rneedz diidz laa ne gac mēēd lo me. ¡Ni nligaa tel ne, xpēēdle me nac ne! Grēraā miech riladzd zhow, sacne runbeyd zho cho nac me.

<sup>2</sup>Bets, bzian, ne nligaa xpēēdle Dios nac ne. Nli ndiond ne niina dien zha glu ne gal dze ne laa Jesús guiaad, per miņe ndionpaa ne, zeēne gal dze co laa ne gac zigne nacpaa me; ni dzigosi laa ne dzian me grop lo ne. <sup>3</sup>Ni grēse zha ne zienie guic yгаа guielnzaac co, tibaque rioxco zho zig zie dze nosaan zho ncuāne runctal xtol zho, sac tel Jesús randzed me dol.

<sup>4</sup>Grē zha ne runctal xtol, xley Dios ga rguits zho, sac grēse dol ne runtaa miech, ga rlu ganle ne rond zho miņe rnabey me. <sup>5</sup>Per nanle to ganle, laa Jesús biaad lo guidzliu, biaadsilaa me miech lo grētaa xtol zho; ni mesi ni tib dol rapd me. <sup>6</sup>Gacxe waa, zha ne nlipaa nacnie me, zienaldraa zho ncuāne

gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

<sup>7</sup>Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios; <sup>8</sup>sangue grë zha ne tibaque quiaayunctal xtol, xnëz mendox ga ngab zho; sac tel mendox, desde padzeela tibaque guieintseeb quiaayun ma. Ni min co nagon nacne biaadpaa Xpëed Dios lo guidzliu, biaadnitlo me grëtaa ncuane run ma. <sup>9</sup>Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espiritu Sant, men ne nacnie zho; rienle zho nodne gunctal zho xtol zho, sac laa zho nacle xpëed Dios.

<sup>10</sup>Nieenpaa cho nac xpëed Dios, chogaa nac xpëed mendox, sac grëse zha ne run guieintseeb, grëse zha ne rleynied samiech, led xpëete Dios nac zho; <sup>11</sup>sac gon, desde dze ne psilo bliladz to Xtiidz Dios, bingazh to ib none gleynie ne samiech ne. <sup>12</sup>Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guieintseeb run me. Ib gunde to mine been Caín.

<sup>13</sup>Gacxe waa, bets, bzian, zeene gan to laa grëraa miech rlëenie to, ib tsode to zhgab guiab to pe nacne sca run zho. <sup>14</sup>Sangue ne rleynie ne samiech ne, gane ndion ne noxtseebdraa ne guioo ne gabil, laa ne bgaale tib guieimban ndzon ne gdzindraa dze lozh; sac zha ne rleynied samiech, nëz ne nitlo zho ga zie zho. <sup>15</sup>Grë zha ne sca rlëenie samiech, rrieequia rut zho ga, ni nanle to ganle zha ne rut samiech, gard ygaa zho guieimban ndzon ne gdzind dze lozh ga.

<sup>16</sup>Ndion ne zha gleynie ne samiech ne, sac Jesússhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleynie samiech, none cueeladz zho zho, cueeladz zho ncuane rap zho, gacnie zho samiech zho. <sup>17</sup>Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiin tib zha ne nacgrë zho, per ib rdeete zho palal pe yquiin zha co. ¿Niacxe na nli rleynie zha co samiech zho ga? <sup>18</sup>Xin yeena, golgacnan sca ganle, led loxaque diidzde, led loxaque laglaadse gnee ne rleynie ne samiech ne; sinque none glu ne nli rleynie ne zho.

<sup>19</sup>Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdo ne zeene laa ne gbig lo me. <sup>20</sup>Tel zha ne rdzieb zdo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me. <sup>21</sup>Xin yeena, laa zha ne desde zdo zho nan zho noguiitsd zho mine rnabey me, scagaa tibiladzse gbig zho lo me; <sup>22</sup>hor cosi ncuane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuane rdziladz me.

<sup>23</sup>Ni lëe min rii rnabey me: Grëse miech, none dib zdo zho gliladz zho Jesús men ne nac Xpëed me, ni gleynie zho samiech zho zigne psanle me diidz ga. <sup>24</sup>Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacnie ne.

**4** Bets, bzian, zha ne gnè zhiEspíritu Dios nacie zho, goon ye zho quianee Xtiidz me lo miech; ib gunde to ne lëälëd gliladz to xtiidz zho, sinque golwigazh dien pe nli zhiEspíritu Dios nacie zho. Sac ndal grè zha ne quianzè lo guidzliu, rquidie zho rnee zho Xtiidz Dios noteed zho. <sup>2</sup>Parne guien to dien pe nli zhiEspíritu Dios nacie zho, golwi dien zha rzac zho Jesús: Tel zha ne rililadz ne nli zig tib miech goc me bиаad me lo guidzliu, ga rlu ne nli zhiEspíritu Dios nacie zho. <sup>3</sup>Laa tel rililadz zho ne nli sca bиаad me, nlid dzigo zhiEspíritu Dios nacie zho; sinque lëäle espíritu ne rtsidi Jesús ga nacie zho. Laa to binle ganle ib laa espíritu co guiaad; ni lëäle espíritu ntseeb co nacie grè zha ne squi quianzè lo guidzliu niina.

<sup>4</sup>Xin yeena, sangue to xnèzle Dios ngab to, yquidiedraa zha co to, sac gon mazdraa nroob poder rap men ne nacie to, lèdle espíritu ne nacie grè zha ne sca ziana grè wseed yozh ne no lo guidzliu. <sup>5</sup>Grè zha co, ncuane rac lo guidzliu rii nonie guic zho; gacxe waa, niapse lëew rnee zho, ni gagaa grèque zha ne rleyne grè ncuane co, zha co rililadz zhiwseed zho. <sup>6</sup>Sangue ne xnèz Dios no ne. Ni scagaa zha ne runbey Dios, zha co rquiaadiag mine rnee ne; laa grè zha ne runbeyd me, rquiaadiagd zhow. Gase na ganle rlu cho zha nacie zhiEspíritu Dios, ni cho zhagaa nacie espíritu ne ziaadquidie miech.

#### Rleyne Dios miech

<sup>7</sup>Bets, bzian, golgotsaa gleyne ne samiech ne, sac gon, tel Dios grèse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpèed Dios nac zho, nli runbey zho me. <sup>8</sup>Laa grè zha ne rleyne samiech, runbeyd zho Dios ga gane sca run zho; sac gon ib Dios rneedz guielbiini lo ne gleyne ne samiech ne.

<sup>9</sup>Gotsaa gwi ne ganle, pa lotaa rleyne me ne: Tibpaa Xpèed me, ni pxeel me me bиаadtizh me xtol ne, zeena ygaa ne tib guielmban ndzon ne gdziñd zhe lozh. <sup>10</sup>Led guiabd ne togo glo miech bleyne Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpèed me, goc me zig tib gon ne gozh grèse xtol ne. Ga nagon rlu pa lotaa rleyne Dios ne.

<sup>11</sup>Bets, bzian, zigne scataa rleyne Dios ne, scaquegaa ne nagon none gleyne ne samiech ne. <sup>12</sup>Gard tso tib zha ne gan Dios, per zha ne rleyne samiech, me ga nacie zho; ni zigse zie dze dib zdooraa zho rleyne zho samiech zho.

<sup>13</sup>Me nac men ne pxeel zhiEspíritu me nacie no, parne glu nacie me no, ni scagaa no nacie no me. <sup>14</sup>Ni stiba, grop lo no bdzion no bиаad Xpèed me bиаadsilaa me miech lo dol; ni min co nonee no lo miech niina. <sup>15</sup>Grèse zha ne rililadz Xpèed me nac Jesús, ni rnee zhow lo miech, ga rlu ne nacie me zho, ni scagaa zha nacie zho me.

<sup>16</sup>Ndion ne ganle nli rleynedox Dios ne, sac rienpaa ne rleyne me ne, ni rililadz ne zeene rnee me pa lotaa rleyne me ne. Ible niaa me par gleyne me, me rdeed guielbiini lo miech gleyne zho samiech zho, zigne rleyne me zho; gacxe waa, zha ne rleyne samiech, ga rlu nacie zho Dios, ni scagaa me

nacnie me zho. <sup>17</sup>Zig nac ne, niina ne laa ne nacniele Jesús, zig zie dze laa ne lozh cseed gleyne ne me, ni gleyne ne samiech ne zigne racladz me; ni scagaa tsod pe nacne ctoladz ne, pe nacne gdzieb ne gdziñ dze ne laa me guñ xquielwxtis me; sinque haxta gley ne dziañ ne me gaļ dze co.

<sup>18</sup>Nod pe nacne gdzieb ne me, sac goñ ndioñ ne pa lotaa rleyne me ne. Led yedraa niina pe dzeb ne dzio ne, sac grēse dzeb rbiche zeene rien ne rleyne me ne. Zha ne rdzieb, zienie guic zho pe nac grē guieļnē ne gañ zho, ga rlu zho gard guieñ zho ne rleyne me zho, ni gardgaa guieñ zho glenynie zho me.

<sup>19</sup>Gotsaa guieñ sca ganle, nli laa ne rleyne Dios, laa ne rleyne samiech ne, per glo me blu ganle pa lotaa rleyne me ne. <sup>20</sup>Teļ zha ne rnee, rleyne zho Dios, ni rlozh ga rlēēnie zho samiech zho, rquidie zho ga. Sac goñ, teļ nand zho gleyne zho samiech zho, zha ne ranlopa zho, ¿pe leļ Dios dzigo gliladz ne nli rleyne zho, ni nac me meñ re ranđ zho? <sup>21</sup>Sac goñ, znu nac xtlidz Jesús: Zha ne rleyne Dios, zigne rleyne zho me, scaque none gleyne zho samiech zho. Ni miñ rii rnabey me dziuñ ne.

#### Zac csaan ne ncuaañe ruñctal xtoļ ne

**5** <sup>1-2</sup>Grēse zha ne dib zdoo rliladz ne ible lēē Meñ ne zēēble diidz cxeel Dios lo guidzliu ga nac Jesús, grēse zha co xpēēd Dios nac zho.

Grēse zha co, par guieñ ne dienī pe nli rleyne ne zho, none guieñ ne dien pe nli rleyne ne Dios, dien pe nli ruñ ne miñe rnabey me. Nac cuent rii, zig nac tib yu miech, zha ne rleyne pxoz mēēd, scaquegaa rleyne zho mēēd.

<sup>3</sup>Sac zeene rleyne ne Dios, zuñ ne grēse miñe rnabey me. Ni grē miñe rnabey Dios, nacda ncuaañe guiab ne griielod guñ ne; <sup>4</sup>sac grēse zha ne nacle xpēēd Dios, totsaque rnalo zho ne Jesús guñ xyudar zho, gacwetraade zho lo grē ncuaañe guñctal xtoļ zho. <sup>5</sup>Golgacnañ sca: zha ne dib zdoo rliladz Xpēēd Dios nac Jesús, zrieelo zho csaan zho grētaa ncuaañe ruñctal xtoļ zho.

<sup>6</sup>Teļ ne, ndioñ ne ni rliladz ne ganle nli Xpēēd Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espíritu Sant nolu ganle ne scaw, ni miñe rnee me diidzliw.

<sup>7-8</sup>Gotsaa gwi sca ganle, tson mod rlu cho nac Jesús: Tiba por miñe nolu Espíritu Sant, stiba por miñe blu zeene norobnis me, ni stiba por miñe blu zeene nolozh me. Zigtaa miñe nolu Espíritu Santa, zigtaa zeene brobnis mew, zigtagaa zeene nolozh mew, blu ganle Xpēēd Dios nac me. <sup>9</sup>Miñe rnee Dios, none gliladz new. Xtiidz samiech ne name rliladz ne, ¿pe leļ miñe rnee Dios dzigo gliladzd ne?

<sup>10</sup>Zha ne gliladzd miñe rnee Dios, rrieequia rzoob zho me ga zig tib zha ne rquidie; sangue zha ne gliladz miñe rnee me, zien zho ganle nli Xpēēd me nac Jesús. <sup>11</sup>Laa me bneele ganle: zha ne gnalo Xpēēd me, zгаа zho tib guieļmban ndzon ne gdziñd dze lozh; sac Xpēēdse me rdeed guieļmban co. <sup>12</sup>Gacxe waa, zha ne rnalo Xpēēd me, laa zho bgaale guieļmban ndzon co; sangue zha ne rnalod Xpēēd me, gard yгаа zhow.

### Bgaale to guielmban ne gdziṅd dze lozh

<sup>13</sup>To ne nac to zha ne rnalole Xpëéd Dios, laa naa rzet miṅ rii lo to zeena gacnaṅ to gaṅle laa to bgaale guielmban ne gdziṅdraa dze lozh ga. <sup>14</sup>Ni scagaa, ndionpaa ne rquiaadiag Dios xtiidz ne, zeene ncuaaṅe rio zdoo me rnab ne lo me; <sup>15</sup>ni zigne ndionṅ ne rquiaadiag me xtiidz ne, scaquegaa none gliladz ne ib zneedz me ncuaaṅe rnab ne.

<sup>16</sup>Zig nac zeene gaṅ to cho tib zha ne nacgrë to beenṅ pe tib doḷ, ni rlu nacda doḷ ne gnitlo zho, zac gnab to lo Dios guṅ me zho perdon; ni gacnaṅ to gaṅle, ible zuṅ me zho perdon. Sac goṅ no doḷ ne rnitlo, ni zha ne guṅ doḷ co, nodne gnab to lo Dios guṅ me zho perdon.

<sup>17</sup>Nli grëse guielntseeb doḷ naca, per no miṅe rnitlod miech. <sup>18</sup>Ni ndionṅ ne gaṅle, zha ne nacle xpëéd Dios rundraa zho ne lega guṅctal zho xtoḷ zho; sac Jesús meṅ ne nac Xpëéd Dios, meṅ co quianap zho, grieelodraa lega pe guṅ meṅdox zho.

<sup>19</sup>Zig nac ne, ndionpaa ne xnëz Dios no ne. Nli ndalraa zha ne zianaḷ ncuaaṅe rnabey meṅdox, <sup>20</sup>sangue ne, laa Xpëéd Dios biaad bdixbiini me xquielrien ne bdziuunbey ne meṅ ne nacpaa Dios. Niinasi laa ne ngable lo meṅ ne nacpaa Dios ga, ni lëë me ga nac Jesús. Me nac Dios nguiamban, ni me nac meṅ ne rdeed guielmban ndzon ne gdziṅd dze lozh.

<sup>21</sup>Xin yeena, golguienṅ Diosse nac meṅ ne gleynie to; gunde to ne lel grë ncuaaṅe no lo guidzliu rii gleynie to, laa ne gleynie to Dios. *Juan*